

巢经巢全集

第五
册

播雅卷第十

遵義鄭 珍子尹編輯

遵義唐樹義子方校訂

唐敬亭惟安五十五首

惟安字汝止號敬亭義伯三子雍正丙午舉人授江南涇縣知縣告終
養歸敬亭生九月母武歿庶母蕭撫成之天資敏悟年十八卽登賢書
至性特過人蕭教之甚於嚴父而尺寸無違者告養時年甫四十依戀
不殊幼小而蕭嚴如故偶拂意雖愛物不碎不已每值如此卽檜隅竈
角必跪而牽衣怡聲請息霽或爲兒嬉戲必得蕭笑乃已在涇清慎自
持充丁卯同考官所得多知名士尹文端公爲制軍賢之調知歙縣三
載不名一錢將歸被劾而對簿悉無驗文端與開復遂歸家有怡老亭
晚稱怡老亭主人作詩和平懇摯寫山水得營邱法時仿高氏指意著

有敬亭詩文集敬亭詩餘今存遊子吟一卷止留歛時作邵泰稱其春
遊女篇感託婉曲唱歎深長有風騷遺音趙青藜謂在涇時詩爲平易
之白傳於歛則激之鬱之使底於工部而性以益摯情以益長皆確論
也配陳孺人綏陽知聊城縣至誨女通經史能古今詩文子銀銖金稱
積學並多出母教敬亭弟君來贈公學於孺人嘗曰嫂吾師也及卒爲
之心喪敬亭詩有云山妻賢且才圖書互相考知必多可傳之作今不
能略得寸紙當更求之

對月

青天若明鏡明鏡涵青天皎皎一輪月清光兩處圓
俯仰無纖塵冰心夜夜懸
呼童啓窗牖願盼生留連

和王指峯倣陸魯望四聲詩四首

飄飄離樊籠欣欣瞻林邱禽懷喬枝栖魚思深淵游栽花明幽窗鳴琴臨清流

高堂承歡顏余心何多求

履道喜坦坦走馬上岵岵遠浦水灝渺繞嶺境邈迤訪古挽好友旨酒買野市
俯仰感已往攬景寫繭紙

世事慨似戲播弄甚詫異嫚罵付喟歎啞笑更畏忌況味邈去信妙用靜處寄
放浪衆謾諧混沌半夢寐

獨欲覓極樂穀祿不足縛出入狎木石脫略若鹿鶴實腹摘苜蓿豁目植芍藥
竭力悅鞠育執爵祝矍鑠

遣興

悵然望白雲疎疎風吹襟悠悠此塵世何以寫我心江山閒修阻蔦蘿慢層陰
自遣聊淹留蒼茫野烟侵野烟故園同還思託微吟

秋日遠眺

雨餘秋氣清於水短竹芒鞋踏高寺一望平原樹若苔十里百里更千里年豐

早稻穫且收野曠哀蟬斷還起長江一線天際來上下風帆簇如蟻羈栖客子
何蹉跎十載茫茫夢裏過江南秋色經幾度家山何處空烟波征鴻陣陣去不
息思欲從之愁網羅長天淡淡雲冉冉俯仰不負朱顏酡

春遊女

二八女郎不解春深居幽室絕世塵小牕日日事鍼線花開花落隨芳辰女伴
招呼綠野遊踟躕未肯出房頭三三兩兩相催促上堂告母含嬌羞阿母笑言
春色粲汝長深閨曾未見相攜好去一嬉遊却早歸來莫遲晏閣中徐換踏青
鞋微步弓弓影亦佳同儕相謔競相眄共道窈窕憎人懷錦簇東郊西更好行
行聯臂沿芳草狂蜂浪蝶苦撩人對人強笑中心惱春風原自可心情到此方
教悔恨生早知陌上多佻達何如深屋聽流鶯路遠旁皇愁莫訴心急斜陽挂
江樹阿母丁甯只早歸安知白日翻多露倉黃不省片泥滑誤踏春塘濺羅襪
佩環自檢幸如初柔心暗顫鬆鬆髮落花殘絮滿城闌門前不改石磷磷家人

執手羣相慰莫爲蹉跎獨愴神顛倒思量堪一笑不事安居事遊眺阿母慣惜
不生嗔夜深自把菱花照

月季花

靈慧籠中鳥鮮明水面鱗籠開便飛去水溢亦騰身天淵各自無消息長與聞
花作主人主人寂寞江之濱紅來紫去目見親一年一度伴吟醉春風秋月無
緇磷月季花開更可人盈盈不斷四時新嚴霜酷日遞寒暑邇眼奇葩菱路塵
花繁葉暗不彫敝吐豔含香別有神王母曾將丹與潤月娥應許桂爲隣我欲
廣栽大地內一爲造化留長春

揚州晤許濟堂刺史

芝蘭經歲別相見慰相思話絮藤纏樹情深月到墀詩壇從律細酒陣出兵奇
莫戀繁華地承明及此時

送吳非簫再遊楚

帆指曾遊處江山是故人九疑斑淚竹七澤錦花鱗屈宋揮毫古湖山發興新
更饒虛左處八詠待嘉賓

次韻寄答冉孝廉

甯長

五字合金石開函見故人已知虛去日不必問前津寒暑隨時變低昂任性真
微軀何足計期不媿君親

月下

皓月當頭見俄驚四十秋遙知今夜影應照故園樓脈脈情何託綿綿思獨幽
低徊更漏永搔首訴離憂

憶丹邱梅花

不得尋梅去虛明雪霽天邱中梅正好屋角月空懸幽夢何曾隔芳心應共憐
春風若相待攜殘續瑤編

除夕

悠悠棲古寺一歲又云除寂寞三杯酒殷勤萬里書爆聲隨地震野色待春鉏
坐見山城曉陽和滿太虛

苦雪二首

彌日山城雪羈栖苦獨多幽蘭思再鼓黃竹憶三歌積砌呼童掃衝寒有客過
西泠花似海不識近如何

憑欄知路滑難策灞橋驢誰送圍爐炭空餘映架書敲詩呵凍硯煖酒話幽居
料得陽和轉春風拂面徐

次韻和王指峯幽居卽事

淡淡雲生處從人借小居竹籬牽錦荔野水泛紅葉得意聽歌鳥忘機愧泳魚
關山千里思無計可消除

汪子能上售一瘦馬人咸以病弃余驗爲水冷草枯失調所致試之則馳
驟自如骨力堅勁雄姿固猶在也感而賦此

年來苦未遇孫陽一困泥塗應自傷
蠶下幾曾經剔刷廐中誰與計溫涼
覆鞍本稱香羅帕絡腦猶勝紫勒韁
珍重莫縻千里志春回沙苑草齊芳

歲暮旅懷

萍蹤莫定更何之江上春回歲暮時
夢繞庭闌空自識愁牽雲樹倩誰知
迢迢故國魚鴻杳寂寂禪關鼠雀窺
近日行廚頻告急天涯猶切介眉思

看梅

雪餘幾樹覆蒼苔眼底春光盡放梅
傲骨何曾傷歲暮清標原不惹塵埃
雀耽雲影高枝立香透柴門小徑開
烟月江南如有約莫教孤負掌中杯

題畫鷹

圖摹宋苑擅奇名展向秋風似有聲
霜落疎林山氣緊天迴遠岸暮雲平
星眸冒許雄狐遁鐵爪猶令狡兔驚
儻與王孫擎臂去縱橫雲海一身輕

寫懷四首

一醉糟醕苦不禁那堪烟雨鎖重陰寸腸曲折縈萊服三載羈遲罷交琴僧院
落花聲寂寂柴門流水影沈沈黟山岷岵登臨遍尙慎旃哉仔細吟
寂寂僧房客影單琴聲三載逐飛翰鳩鵲已羨離雕檻舴艋無因阻巨瀾荒草
蒙茸花漸瘦蒼松零落鶴難安低徊怕寫傷春字黃海雲深歸路漫
無端變態出尋常潦倒迷塗總斷腸深瑱朱蛾花是獄密籠黃鳥柳爲防醴泉
竭後鳳憂渴丹甚殘時鳩慮荒欲叩碧翁求底細帝閭遼廓路茫茫
世路多歧最易迷撩人如醉復如癡和光混俗原非計守樸歸真却蹈危萬里
自寬惟強飯終朝無事只敲詩雞豚自許承歡笑料理歸鞍尙未遲

遣興

輕烟浮動散平湖山影依微淡欲無彩篆雲痕天未老光生蟾缺月重蘇花梢
夢破飛蝴蝶草徑春歸叫鷓鴣渺渺予懷何所託琴書猶是一迂儒

閱山行畫圖擬江口道中

十幅蒲帆落夕津
征程旋向嶺頭分
離聲遠應千峯
瀑樹色平穿幾處雲
浦外迷離飛細雨
邨前隱約吐斜暉
重巒不似風濤險
贏得山禽到處聞

對雪書懷四首并序

壬申冬杪兀守禪關密雪同雲侵人肌骨時與任楚川圍爐共話把酒迎寒
案頭見李肅邨挈眷返里詩家庭樂趣溢於毫楮視余之羈身萬里睽隔庭
闈者大相遠矣因步韻寄懷

洒遍山河盡子虛
任渠飄泊待何如
欲從短策尋梅萼
擬探羞囊問酒車
僮僕依偎商釜爨
魚鴻寂寞憶家書
那堪歲月蹉跎去
依舊蕭蕭冷寺居

一白茫茫何處家
荒寒僧舍度年華
鹽空撒地真無味
絮止漫天那是花
書劍不離三汊水
夢魂長繞半山衙

余居里名

何時見曉融春溜
載賦歸來泛釣車

憑欄遠望思依依
心逐迴風高下飛
烏鳥衝寒猶返哺
同雲出岫似忘歸
天涯知己欣同調
紙閣紅爐且共圍
卻羨前窗松上鶴
攤攤穩睡自忘機

雲光融處見山青兀坐僧齋讀古銘游子守身嚴履蹈諸孫怡老有園亭

余家園有

亭名怡老

乾坤郎徹同冰鑑世路微茫似火螢大塊春回新萬象安排風雨護花鈴

癸酉仲春道經蘭石趙心仙持丙寅幕溪泛舟唱和一帖見示時余有小序並鄙句附諸公後屈指於今八年不勝今昔之感復見心仙補韻十首愛其思致飄逸更綴二章又曩帖中所無也

月夜舟行九曲溪山東月色照山西珠翻湛露迷汀草金蕩流波浴石雞搖曳櫓聲清磬合參差竹影暮烟齊橋邊風動涼生袂歸鳥猶聞繞樹啼

月夜舟行九曲溪探源直抵五陵西杯傾婪尾方鳴鶴棹返仙槎恰聽雞象外怡神欣自足靜中得句妙難齊烏升兔逝雲千變依舊溪山鳥亂啼

過涇縣答鄭雲皋贈句次韻

日融花檻讀新詩齒頰清芬慰渴思南國誰將憐季路高山猶喜遇鍾期閒雲片片迷歸岫倦鳥聲聲戀故枝多少情懷難自遣唱酬偏值艷陽時

友人邀遊大幕山待月限韻

九曲波流一派清平橋薄暮翠烟橫
慈烏戀哺邨前樹杜宇催歸夜半聲
待月同人情脉脉望雲獨自意盈盈
幾回搔首禪扉裏花影參差露氣清

再遊小幕山

小幕停驂一再遊烟巒無恙且舒眸
雉雛護母窺新麥麋老修茸依古樛
九曲

谿回腸轉轂雙橋雲幻影如樓

山下有九曲溪溪有雙橋

悵將苦茗消塵渴何日歸山解客愁

次韻答吳非簫

孤琴隻劍過蕪城天氣初涼萬籟清
身不羈縻衣履適胸無塊壘夢魂輕
歸田似我成何用僑寓逢君別有情
尊酒縱談消醉墨秋葵花向筆端傾

次韻友人贈菊

淡淡風前雨後枝莫嫌冷艷獨開遲
可知老圃摧殘後正是高人屬重時
晚節豈終籬下寄孤芳未許俗情知
勞君摘寄供清玩領略餘香酒謝之

次韻十寺鷗聲

路迴深竹舊經壇爲喜幽栖過碧巒
十寺朱櫻雲欲爛一聲黃鳥月初殘
拖烟柳色連波翠露帶花光襲袂寒
不似猿啼三峽杳旅人清夜夢難安

內人書至

老妻書至勸還家細囑還家物事賒
彭澤子魚無錫酒宣州名栗藿山茶
巴茅已補牀頭漏扁豆猶開屋角花
歎息壑廉總需幾爲誰留滯在天涯

題畫梅

一紙梅花瘦清標想臥龍江南春色
好旅况若爲容

題丁笏峯馳馬歸里小照二首

并引

衡陽丁笏峯從兄宦吳十載心懸堂
上寄意茲圖吳去衡陽道里不過二
千遵彼長江指日可卽余則別親萬
里客子十年日夜思歸何時得遂披
閱之

下用志感云

作客三千里歸心逐雁忙雲山重疊處仿佛近衡陽
我計辭親日于今亦十年披圖心愈迫何日著歸鞭

春日偶成

微風細雨妒花天喚客鶯聲又一年看遍江南春九十搖搖心旆繞湘川

獨酌

不寐病來惟酒藥無錢債積以詩酬請看精衛填滄海翠羽摧殘卒未休

客窗秋曉

籠鳥爭鳴鄉夢破鑪烟細裊曉風微癡童不省撩人處翻謂今秋蟹更肥

次韻李嘯邨惠指畫餅菊題句

風流爭羨老名家指下秋容雅韻賒不是鄉關千萬里從遊譜盡廣陵花

時因客廣

陵

題畫禽翠

萬里晴光映碧虛春風和煦羽毛舒一溪新漲清於鏡應有桃花引醉魚

歸思二首

青青芳草接籬笆節到清明子到家天似從心頻得兆曉來鵲噪夜燈花
歸去沿堦掃綠苔衡門無事日常開成行桃李參差發疎密還須漸補栽

雙卿記題詞四首

姑惡聲聲烟雨愁騷人腸斷怕登樓幽窗聽到傷心處再勸靈禽一世修
反目斑離最不倫陰晴無定豈由人明知不是鸞皇侶珍重林梢度一春
百舌花間語不休逗人離思引入愁誰能到此心如水分與長江滾滾流
精衛空將翠羽凋填成塊壘轉難消願煎海水爲醇酒萬古愁腸一槩澆

唐贈公惟格 九首

惟格字君來羲伯四子以曾孫樹義任陝西按察貤贈如其官贈公少
有奇童之稱年十二補弟子員一應省試卽絕意科目遍歷諸兄官署

遊覽名勝興至揮豪每壓能者生平所作甚富有半山草堂集皆燬於火

答人問所居 十二歲作

離城十里半山衙半畝桑麻半畝花庭內幾株丹桂樹竹林深處是吾家

同人遊李氏山房因憶故園梅花二首

結伴城南路亭林半畝寬異鄉逢歲暮微雨遞春寒歷落叢梅樹扶疎倚竹看
含情獨無限爲爾費盤桓

容易經年別東風遠道思故園親手種深雪又花時索笑何人共鄉心只夢知
當窗無恙否吟望正低垂

籠鳥

本適飛騰性何因久碧籠雲霄遲爾振毛羽有時豐衆鳥休相笑乘風亦自雄
解縲人念否得勢看摩空